



UPA 2014/52.1
9. april 2014
nhn

Atorfimmi peqquserlussinnaanerup (*ileqqorlunnerup*) akiornissaanut Naalagaaffiit Peqatigiit isumaqatigiissutaannut Kalaallit Nunaata ilanngunneqarnissaanik matumalu aalajangiiffigisassatut siunnersuutip akuerineqarnerata kingunitsiannua tamatuma sulissutigineqalernissaa aallartinneqaqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasorta q Sara Olsvig, Inuit Ataqatigiit)

Sara Olsvig-ip Inatsisartut aalajangiussassaattut siunnersuutaa pisariaqavissutut oqaatigisariaqartoq Inuit Ataqatigiinniit tamakkiisumik taperserparput. Siunnersuut pineqartoq ullutsinni siunissamilu aningaasarsiornikkut ingerlatsinermit upalungaarsimanissamut tamakkiisumut ilaasussatut isigaarput. Malittarisassat nunatsinniinaq atuuttut saniatigut, nunat tamalaat akornanni isumaqatigiissutinut suliniaqatigiiffinnullu peqataanissaq pisariaqartutut isigaarput, ilaatigut aningaasarsiornikkut peqquserluttarnerup annertusiartortumik nunat tamalaat akornanni pisarmat.

Naalackersuisut pineqartumut eqqumaniarnerat akissuteqaamminnilu peqquserluttoqarsinnaaneranut assingusunullu sillimaniarluni suliniartoqarneranik nalunaaruteqarnerat iluaraarput. Innuttaaqatigiuvugut ikittunnguit aammalu aningaasarsiornikkut annertoorsuarnik ingerlatsinermik soqutigisanillu misilittakkavut killeqarmata, upalungaarsimanissamut sakkussaasinnaasut tamaasa pisariaqartippavut.

Tusaamanearluartup Fraser Institute-p nunatsinni peqquserluttoqannginneranik aammalu peqquserluttoqarnissaanik ilimasunnginnerarluni nalunaarutaa soorunami nuannaarutissaavoq. Tamannali siunissami peqquserluttoqarnaviannnginneranut qulakkeerutaasutut isigineqarsinnaasorinngilarput. Paarlattuanik pissutsit allanngorujussuarsinnaanerat naatsorsuutigisariaqarpoq suliniutit annertuut aatsitassarsiornerlu kissaatigisatsit naatsorsuutigisatsitullu piviusunngussappata – taamaassappat pissutsit ullumikkut nalunngisavut allanngorluinnassapput, ullumikkummi taamatut ingerlatsisoqanngingajavippoq.

Taamaammatt aamma kattuffiit naalackersuisoortuunngitsut soorlu ICC, Transparency Greenland allallu ataatsimoorluta soqutigisatta illersorneqarnissaannik suliniuteqartuarmata qutsavigisariaqarpagut.

Peqquserluuteqarsinnaanerup tamatigut, tassalu aatsitassarsiorneq kisiat pinnagu, akiorniartariaqarneranik Naalackersuisut isummernerat isumaqatigaarput. Inuussutissarsiorfinni assigiinngitsuni aningaasarsiornikkut soqutigisat annertusiartortillugit, ilimagisariaqarpoq inatsisinik ileqqoreqqusaasunillu sanioqutitsinissamut ussarnartorsiorsinnaaneq annertusiartussasoq.

Inuit Ataqatigiit-nni inuiaqatigiittut soqutigisatta illersorneqarnerat sulissutigiuassavarput suliniutinullu ajunngitsunut tamanut peqataassaagut.